



Oxygen agi anungba mapang PM-i
CM tem den senden amen

Tokyo Olympics nung Neymar
asayadaksüner: Andre

VOL. XVIII NO. 189 (ADOK 189) DIMAPUR

KÜPTOKNÜ (SATURDAY)

RONGCHII (APRIL) 24, 2021

₹ 5.00

Dimapur nung Holotoli School shibangtsür

Dimapur, April 23 (TYO): Iba osang ya CMO, Dimapur- i Deputy Commissioner, Commissioner of Police aser Holotoli School kibur dangi züluba shidi ka nung metetdaksüo.

India nung COVID-19 azüoktsü tasak: WHO

New Delhi, April 23 (Agencies): India nung COVID-19 menatepba azüoktsü kanga tasak asütsü ta Hokolbarnü World Health Organization (WHO)-i metetdaksüo.

India nung COVID-19 kanga putetba atema teblemstü WHO Emergencies director Mike Ryan-i "India nung COVID-19 menatepba azüoktsü atema senzusenbongba noktangtsüla" ta ashi.

Arunachal sorkari arishi küm 18-44 nem vaccine angati agütsütsü

Itanagar, April 23 (Agencies): Arunachal Pradesh sorkari arishi küm 18 nungi 45 tsungda alir nem COVID-19 vaccine angati agütsütsü.

Hokolbarnü Chief Minister Pema Khandu menden ser cabinet senden ka amendang iba telemtetba agi.

Iba senden nung COVID-19 jenjang aser vaccine agütsüba osangtem metetpelaa liasü. Cabinet-i health department

Meghalaya Minister temi itasen 10% COVID-19 atema tenlar

Shillong, April 23 (Agencies): Meghalaya nung COVID-19 kanga putetba mapang ka nung Meghalaya nung Minister temi January nungi March tashi parnok itasen nungi 10% Chief Minister's Relief Fund nem agütsütsü lemtego.

Iba ajanga minister tem indang itasen nungi Rs. 3,53,250 tashi COVID-19 anema rara nung amshitsü.

Khakhati nung mozü ayokertem apu Dimapur nung alir ka dena lir

Bokajan, April 23 (Agencies): Brihostibarnü Assam-Nagaland arrtsü anasa Assam Police-i mozü shibeneler telok ka puogo.

Bokajan police nungi police telok kati mozü alirtem ama mozü ayokertem dang heroin alitsü osang agitep.

Iba sülen police-i Khatkhati nung aliba Rajdhani Restaurant nung mozü shibelenertem apu. Mozü shibelenertem jagi auto rickshaw (NL07 F 9817) nung mener mozü ayoki aru.

Assam Police-i mozü shibelenertem Nagendra Mahato aser Babul Kumar na ket nungi sapon pongdang 25 nung heroin

COVID-19 Nagaland: Nisung 89 dak putet; 95 süogo

Kohima, April 23 (TYO): Hokolbarnü Nagaland nung nisung 89 dak COVID-19 aliba putet aser parnok züngsema nisung ajak agi 12,889 kümogo. Külen, tanü COVID-19 agi shiranger ka asüba züngsema tasür ajak agi nisung 75 kümogo.

"Tanü nisung 89 dak COVID-19 putet. Parnokji Dimapur nung nisung 85 aser Kohima nung 5 lir. Ano, Kohima nung shiranger ka taneptsü angu" ta Health & Family Welfare Minister, S Pangnyu Phom-i metetdaksü.

Nisung 12,889 rongnungi 12,117 tashi taneptsü nguogo aser tang nisung 456 anepaludar, ta pai ashi.

Hokolbarnü Health & Family Welfare Department-i Nagaland nung COVID-19 indang tensa kanga junga meyipa reprangogo, ta Minister Pangnyu-isa metetdaksü.

Nagaland nung aliba health centres ajak nung osettem

asur nübo aliba osang jangjatepogo aser nungdakba ajiteta inyaksü, ta paisa ashi.

Sorkar aser department-i iba wara azüoktsü atema akokba tashi mapa inyaksü anungji nübortemi teblemstü abenba senso kaka onok den yariteptsü ayongzüker, ta Pangnyu-isa ashi.

"Nagaland ung COVID-19 nungi taneptsü angur 94.01% dang kümogo," ta State Nodal Officer for Integrated Disease Surveillance Programme, Dr Nyanthung Kikon-i ashi.

"Tuensang district nung COVID-19 agi shiranger ka asüba züngsema tasür ajak agi nsung 95 kümogo. Ajisüaka, tasürtem rongnung parnok 10 bo tanga timtem ajanga asü aser ka asüba bushisüngdang südar" ta paisa metetdaksü.

Nisung 221 tashi tanga state temi ogo, ta Dr Kikon-isa ashi.

"Tang anepalurtem rongnung nisung 31 dak shirangba yimya tera lir, 10

tera timtema oxygen agidar aser 4 kanga mejungi shiranga oxygen agüja anepaludar" ta paisa shisem.

Nagaland nung COVID-19 alitsü akok ta temolung melemi bilemba sample 1,42,528 tendangogo. RT-PCR ajanga 77,149, TrueNat ajanga 37,877 aser Rapid Antigen Test ajanga 27,503 tendang, ta Dr Kikon-isa ashi.

Külen, Brihostibar tashi nung Nagaland nung nisung 1,41,406 nem covishield indang dose 1,77,549 agütsüo ta State Immunization Officer Dr Ritu Thurr-ia metetdaksü.

Vaccine agirtemji frontline workers 46,509, healthcare workers 14,005, teintet rogo 39,148 aser arishi küm 45 ser tempur 41,744 lir, ta paisa ashi.

Parnok rongnungi frontline workers 22,662, healthcare workers 9,397, teintet rogo 2,741 aser arishi küm 45 ser tempur 1,343 tashi vaccine indang dose anaprong agiogo, ta Dr Thurr-isa metetdaksü.

Mkg Dist nung Moatsü benjong mamungtsü ozüng agütsür: Mkg DC

Mokokchung, April 23 (TYO): Covid-19 tali züina aoba ajanga nüburtem kümzüka ayutsü mechi 'Epidemic Diseases Act 1897 & Disaster Management Act 2005' ozüng nung ajemdaker, District Task Force Covid-19 Mokokchung senden 23/04/2021 nü mena Mokokchung district kübok yim/union shingaia Moatsü benjong ayongzüka mamungtsü tetuyuba agütsür, ta Mokokchung Deputy Commissioner - Limawabang

Jamir-i ozüng kuma sangdongogo.

Tanabuba nung, tetuyuba tasen ka magütsü tashi town mesüra sub-division mesüra yimtsüng kecha nunga interstate hopta bazaar melapoktsü ozüng agütsüo.

Tasembuba nung, tanga state nungi arurtem (interstate travellers) ajaki Covid-19 ozüng (protocol)/teinyaksü (SOPs) kechisa latetja lir, itemji kanga junga anitaksüla aser sorkar

bangdak den amaliteptsüla.

Pezübuba nung, tsüngsü bushiba aser tetendanga agiba (contact tracing/testing) maparen nung sorkar bangdak den amaliteptsüla, ta kasa ozüng nungsa metetdaksü.

Kija/telok kari danga item latetsüba ozüng nung aibelenra, Epidemic Diseases Act 1897 & Disaster Management Act 2005-i melaba ama temerenshi alitsü, ta Mokokchung DC-isa metetdaksü.

DCCI-i Dimapur nung shishilembartem kümdangtsü metetdaksür

Dimapur, April 23 (TYO): Dimapur Chamber of Commerce and Industries (DCCI)-i Dimapur nung dokan kiburtem aser shishilembartemi Covid-19 tensa nung ajemdaker osettem bendena mayutsü metetdaksüo.

"Dokan kibur mesüra shishilembar kari danga chiyungtsü/osettsüset bendena ayuba putetra dokan shibangtsütsü aser district administration ket nung chiyungtsü/osettsüset angati alemstü atema agütsütsü," ta DCCI president Akashe Zhimomi aser Grievances Cell

convener Omega Yephthomi nati sangdong ka nung ashi.

DCCI-i district administration aser Dimapur Municipal Council teyari agia shishilembabaren mita reprangtsü, ta tenatasa ashi.

Dimapur nung tang nungdakba ajak peria dang lir anungji public-i metokmeperi ajurura osang agütsütsü metetdaksür, ta DCCI-isa metetdaksüo.

Tesüiba hopta ishika India nung mustard oil, other cooking oil, pulses aser MS rod o cement amala nung jenjang atuba osang

angazüker.

Anungji shishilembartemi item ya bendena mayutsüla aser jenjang matutsüla, ta DCCI-isa ashi.

Shishilembar ajaki District Task Force-i tuyuba SOP sülen anidaksüla. Covid-19 anema tongpang ya sorkar aser administration-i dang masü saka civil society teloktem aser public-ia nungita yaritsüla, ta parnokisa ashi.

DCCI-isa public dang ken o tem adokra 9436002945, 9402022222 aser 7005526728 nung WhatsApp ajanga yoktsü metetdaksüo.

Kohima nung Crescent international Hotel lapokogo



Old NST Kohima nung April 23, 2021 nü Crescent International Hotel semzükba mapang tangokba noksa ka yangi angur.

Kohima, Rongchii/April 23 (TYO): MLA Khriehu Liezietsu ajanga Hukulbarnü Old NST Kohima nung Crescent International Hotel semzüksüogo.

Iba hotel semzüksüba sentong nung jembiba mapang MLA Liezietsu-i ashiba agi, Kohima nung hotel aser guest house tajung agi anünga liasü saka Kohima jila tiyong nung iba 3 Star hotel tasen ya lapokba ajanga hospitality sector tajungba ajumtsü.

Iba hotel indang tongmelang agi metetbelaba mapang, Crescent ya chiyongtsü tabu balala anguba aser anenzükba hotel ka asütsü, koba agi alima balala nungi arurtem nüngdakba peritsütsü, ta CEO Crescent International Hotel, Kohima, Keneikhrielie Mephu-o ajanga ashi.

Crescent ajanga nübur tenzüksü tangatetba lir aser iba yongji staff shilem 90 bo yangi aliba lanurtem lir, shirnok nem management team ka ajanga

nüngdakba training agüja parnok inyakyim tendanga liasü, ta pai ashi.

Tensa melenshia aoba ama nüburtemi chiyongtsü sapuba melenshir, anungji Crescent ajanga jenjang talang nung chiyongtsü tabu aika agütsütsü sentong lir, ta paisa ashi.

Iba hotel semzükba sentong nung Advisor, Urban Development and Municipal Affairs, Dr. Neikiesalie Kire aser NPF MLA Keneizhakho Nakhro nungera dena liasü.

Longleng district kübok teinyaktsü kar metetdaksür

Dimapur, Rongchii/April 23 (TYO): Danga state tem nungi Longleng district-i meyipa shilangertem anepalutsü aser ketdangtsü asoshi district kübok aliba yimtsung aser ward ajak ketdangsurtem dang teinyaktsü yimya kar metetdaksüogo.

Sangdong ka ajanga ashiba agi, dangalen nungi meyipa shilangertem ya Longleng district-i aitba sülen anogo ter (10) atema pei sasa dangar dak nungi pila alitsü/home quarantine asütsü. Home

quarantine mapang dangalen nungi meyipa arurtem ya ki alema aotsü memelatsü.

T e s e m d a n g e r a marudaktsütsü aser COVID-19 tashidak nungi jembua alitsü meratem agitsüla, ta ashi.

Dangalen nungi meyipa arurtem yimya kecha nungi mezüngmeshi masütsüla. Dangalen nungi meyipa arurtem ya anogo ter home quarantine asüba mapang COVID-19 dak sendakba timtem kecha madokra, iba sülen quarantine nungi

salatsüla.

Tia maka aketba/temang metaba/tango sashiba nung tim atemba/menemba aser chiyongtsü chitetba yimya samaba/tenük arongba/ saksü-pokshi mesüra COVID-19 dak sendakba timtem kar danga lira, tekeratiba nung ketdangsur nem osang agütsütsüla, ta sangdong ajanga ashi.

Maneni Longleng District nung COVID-19 Helpline number tem 7005939851/ 9612927005/ 6009964294/ 8787614315 alitsü.

ANCDPOA pur Silver Jubilee mungogo



Dimapur, Rongchii/April 23 (TYO): All Nagaland Child Development Project Officers' Association (ANCDPOA) pur küm 25 ajungba (Silver Jubilee) benjongmung Niathu Resort, Dimapur nung April 23, 2021 nü mungogo.

Iba benjongmung nung tesemdang tongti ka ama jembiba mapang Director, Social Welfare, K. Atoli Sema-i ashiba agi, Department of Social Welfare ya department tuluka lir, koba agi human security, teintet rogotem, tarutsü putu indang temang

anema yutsüba aser lokti ajungkettsü asoshi danga social security aika repranger. Anungji iba department nung inyakba asoshi ketdangsurtem nüma adangtsüla aser kasa mapang nendaka agüja mapa inyaktsüla, ta ashi.

Department kübok lokti tentet balala den tesendaktep tajung aliba ya ajanga department junga aliba sayur, anungji kati ka ajungshitepa, yaritepa aser kati ka dak nungi angazüka alitsüla, aji asünung dang department tejakleni aotsü aser timtem aika

koktetsü, ta Director-i ashi.

Iba sentong tenzükba Pastor, 15th NAP IR, Neibu Sanchu ajanga sarasadem, Jubilee Convenor, C. James Ezung ajanga tarur pela agizükba o jembi aser ANCDPOA tir, D. Terhuja ajanga tir o jembi.

Maneni sentong nung taoba Director, Khevito T. Shohe-ia tepela o jembi, Assistant General Secretary, ANCDPOA, Imliyanger ajanga tepela ankep o jembi aser jubilee mung nungtem nung momento aser kulikaket tem lema agüja liasü.

State Level War Room Core Committee for COVID-19 züngsemtem shimogo

Dimapur, Rongchii/April 23 (TYO): State Level War Room Core Committee for COVID-19 züngsemtem shimogo, ta sangdong ka ajanga ashi.

Iba committee nung züngsemtem yamai alitsü:

1. J. Alam, Chief Secretary : Chairman
2. T. John Longkumer, DGP : Member
3. A.S. Bhatia, Principal Secretary, Health & Family Welfare : Member
4. Abhijit Sinha, Home Commissioner : Member
5. Rovilatuo Mor, Commissioner, Nagaland : Member
6. Lhouchalie Viya, Secretary, NSDMA, Home : Member
7. Dr. Kevichusa Medikhru, Principal Director, H&FW : Member

Core Committee züngsemtemi par mapa inyakba nung yariteptsü asoshi State Level War Room nung item ketdangsurtem densemdaktsür:

1. Shanavas C. Principal Director, School Education.
2. Manoj Kumar, SP (Crime)
3. Sachin Jaiswal, Jt. Secretary, Agriculture.
4. Ajit Kumar Ranjan, Jt. Secretary, H&FW.
5. Dr. Nyan Kikon, SNO, IDSP, H&FW.
6. Johnny Ruangmci, OSD, NSDMA, Home.
7. Er. Namang Sepong Chang, Dy. Secretary to Chief Secretary
8. Benjamin Longkap, Asst Commissioner, O/o Commissioner Nagaland
9. Dr. Longri Kichu, Consultant, H&FW.
10. M. Rollan Lotha, COO, NSRLM, RD.
11. Er. Daniel Krocha, Deputy Director, IT&C.
12. Er. Yanger Longkumer, Program Officer, IT&C.
13. Rendemo, SERO, NSDMA.
14. Kozo Lasuh, UDA, School Education.
15. Lumdemo Kikon, UDA, School Education.

COVID-19 dak sendakba nung teyari agitsü asoshi tsünglanglen agüja aliba number nung tongteprateptsü akok:

Nagaland COVID-19 War Room

Email:- warroomnagaland@gmail.com

03702270033, 03702270010

State Emergency Operation Centre (SEOC) NSDMA, Home Department.

0370-2291122/2291120 / Toll free No. 1070.

Email: seoc.nsdma@gmail.com

Tening nung Pre-Matric Scholarship Scheme indang training agütsü

Dimapur, Rongchii/April 23 (TYO): Department of School Education ajanga Education Block Resource Centre (EBRC) Tening nung April 23, 2021 nü "Pre-Matric Scholarship Scheme" indang seminar ka school tesayurtem asoshi ayongzükba katsüogo.

Iba sentong nung Deputy Director aser State Nodal Officer for Scholarship Scheme, Limadangit Jamir-i anir DEO Peren aser SDEO Tening nungi ketdangsurtem shisalen sayur ama dena liasü.

Deputy Director & SNO, Limadangit Jamir ajanga tarur pela agizükba aser iba sentong ayongzükba nukjidong lemsatepa liasü.

Department of School Education nungi Jangsem Tzudir ajanga Pre-Matric Scholarship Scheme kübok yimya balala aser NSP 2.0 guidelines tem, Minority aser Tribal Scheme kübok scholarship agizükba agitsü atema temsüa alirtem indang rateta shia liasü.

Training agirtem aser sentong nung adener Institutional Nodal

Officers nem tali tejangjaba angatetdaksütsü mechi, Special Educator, DoSE Züheto Nyuthe-i iba sentong nung NSP 2.0 portal aser web based "scholarship.Nagaland.gov.in" nungi Pre-Matric Scholarship Scheme atema apply asüba yimyatem sayu.

Tumben P Tsanglao, EAC Tening ajanga tepela ankep o jembiba mapang, kaketshirtem, talisa tepetzük jenjang nung aliba kaketshirtemi shisaliok bushiba nung yaritsü asoshi senotsü teyari lenmang sayutsü mechi iba ama yakyaka shilem agiba atema Department of School Education dang pelaba lemsatep.

Institutional Nodal Officers ama shimteta aliba tesayurtem danga sorkar mapa tenzükba nung kisung masü saka nübur tenzükba nunga yakpang sür kaketshir nem iba ama sorkar nungi senotsü teyari agütsübatem agitettsü asoshi yaritepa lenmangtem sayutsüla, ta paisa ajungshi.

Iba sentong nung sorkar aser juri kaket rejutem nungi tesayur jenti arua dena liasü.

Kiphire nung Anti-rabies Vaccination camp agitsü

Dimapur, Rongchii/April 23 (TYO): World Veterinary Day anogomung nungtem nung Department of Animal Husbandry & Veterinary Services ajanga April 24, 2021 nü District Veterinary Hospital, Kiphire nung Anti-rabies Vaccination camp angati

ayongzüktsü, ta sangdong ka ajanga ashi.


Iba camp ya anepdang 7:00 ako nungi tenzükba alitsü, anungji azü metsürtemi COVID-19 indang SOP tem shidak amshia iba maongka agitsü ayongzükter, ta sangdong ajanga ashi.



Guwahati nung aliba TRP Indoor stadium nung nurse kati tetsür ka dak Covid-19 vaccine tuloktsüdang agiba noksa angur. (Guwahati, April 23)

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, Itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nung juga taneptsü mang. Ajisüaka, tang **H. Umar Chesam contact no.7627998690 / 9362359056**

Address: Burma Camp 2nd Police point opp. tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM -Yours sincerely - Sentikumla, Add: 5 Mile, 9402208339**



ONGC mapa inyaker pur aoba atema police-i nisung 14 apu

Sivasagar, April 23 (Agencies): ONGC nung mapa inyaker nisung 3 pur aoba atema Sivasagar Police-i nisung 14 tashi pua lir. Bodbar nikongdang nungi tenzüka Sivasagar Police-i district kübok tesem balala nungi nisung 9 apu aser yashi Nitaipukhuri outpost nung police-i nisung 2 apu. Nitaipukhuri police-i apuba nisung anaji Bangshi Borgohain aser Pulin Borgohain na ta jangjaogo. Police-isa ONGC indang

security guard 3 aser ambulance driver pua lir. ADGP (Law & Order) GP Singh-i anir Assam Police nung temaba ketdangsürtem adenba telok kati tesem tonga oa bushisüngdang tenzüko. Bodbarnep 1:30 ako meta prangpong abenertemi pur aoba ONGC mapa inyaker nungi Mohini Mohan Gogoi aser Ritul Saikia aser Jorhat district nungi Alakesh Saikia nung lir ta jangjaogo. Mohini Mohan aser

Alakesh na ya junior technicians lir aser Ritul ya junior engineering assistant inyaker. Par asem ya ONGC indang production department nung inyaker aser Sivasagar nung aliba ONGC Colony nung alir. Sivasagar Police-i iba tatalokba dak sendakba nung nisung 14 apu aser osang kar ajanga parnok 9 bo police-i chiokogo ta ashir. Iba inyakyim nung ULFA(I) dena lir ta Assam Police-isa metetdaksüogo.

Manipur Forest Department-i Nestle company dangi shidi zülü

Imphal, April 23 (Agencies): Nestle India-i Kitkat chocolate brand nung Keibul Lamjao National Park (KLNPN) ya Meghalaya nung lir ta kanga dang aibelen tulu ka süogo. Iba atema Manipur Forest Department-i Gurgaon nung aliba Head Office Nestle House, CMD Suresh Narayanan dangi shidi ka zülüogo. Nestle India-i nenok indang chocolate brands ka indang wrapper nung osang tai agütsüogo, ta Manipur Forest Department-i shidi zülü. "KitKat chocolate indang wrapping paper nung 'Keibul Lamjao National Park' zülüa lir

saka iba ya Meghalaya nung ta shia lir, ajisüaka ibaji khenyongi tai lir" ta Manipur principal chief conservator of forest (wildlife) - Dr AK Joshi-i ashi. Talisa, iba wrapper nung red panda indang noksa ka lir saka ibaji KLNPN nung mali. "Iba ya Nestle company-i tebilemsü kecha melii inyakba mapa ka ama ajiteter kechiyong nenoki kuli tejanga mebushii dang iba mapa ya inyakogo" ta Dr AK Joshi-isa metetdaksü. Manipur Forest Department-isa Nestle company dang iba aibelen metongshitü atema metetdaksüogo. Keibul Lamjao National

Park ya Manipur kübok Bishnupur district nung lir. Alima nung floating park iba ya dang lir aser nungtuğu Loktak Lake nung tongti shilem ka lir. Hokolbarnü Nestlé India Limited-i Manipur nung dang tatok meshiogo. "Onoki arem indang packs renemba ka nung osang tai agütsüogo. Onoki akokba tashi tekaratiba nung item tesem atema packs ana sayatsü. Pack anaji Keibul Lamjao National Park, Manipur aser Balpakram National Park, Meghalaya indang asütsü" ta Nestlé India Limited-i metetdaksü.



Manipur state sorkari Hokolbarnü Khongjom War Memorial Complex, Thoubal district nung Khongjom war heroes nem tetushi agütsüba sentong agidang tangokba noksa angur. 1891 küm Anglo-Manipuri War nung parnoki British nung anema tasü itta rara. Chief Minister N. Biren Singh-i anir Deputy Chief Minister, Y. Joykumar, Cabinet Minister tem, MP, MLA tem aser tongti ketdangsürtemi Khongjom War Memorial nung aser iba sülen Paona Brajabashi indang kürakyanglu nung naro yuja tetushi agütsü. (Imphal, April 23)

Tripura nung Covid puteter nisung 31 jena ao

Agartala, April 23 (Agencies): Tripura nung Covid care centre ka nungi tanga state tem nungi arur Covid positive nisung 31 tashi jena ogo ta ketdangsürtemi ashi. Brihostibar anepdang yakta Panchayat Raj Training Institute nung aliba Covid Care Centre nungi nisungtem jena ao, ta SDPO Anirban Das-i ashi. "Onoki railway stations aser airports dena tanga tesem ajak nung osang sangoktsüogo.

COVID-19 puteta alirtem aputsü atema onoki merangdar" ta Das-isa metetdaksü. Tawa tu Uttar Pradesh, Haryana aser Rajasthan nungi nisung 31 tashi Tripura nung Tripura State Rifles (TSR) indang riflemen interview nung adentsü atema aru. Ajisüaka, Tripura sorkari Covid putetba nung ajemdaker iba interview indang outdoor aser physical tests thiogo.

COVID-19 tensa mejungi kümra Meghalaya lockdown asütsü

Shillong, April 23 (Agencies): Meghalaya nung aser talisa Shillong agglomeration nung COVID-19 kanga puteter aser iba atema State sorkari tanaben lockdown benoktsü akok ta shiogo. Meghalaya Chief Minister Conrad Sangma menden ser senden ka amendang East Khasi Hills district nung April 30 tashi tourist spots shibangtsü telemtetba agi. Sorkarisa May 3 tashi college ajak shibangtsü aser April 26 nungi May 2 tashi Shillong nung

non-essential shops shibangtsü telemtetba agiogo. Maneni, sorkar office tem nung mapa inyaker 33% dang mapai arutsü atema sorkari metetdaksüogo. Tanga state tem nungi Meghalaya-i arur ajak RT-PCR test agitsüla ta sorkarisa telemtetba agi. "Vaccine indang dose anaprong agirtem aser certificate alirtem dang tenokdangba kübok madentsü" ta deputy chief minister Prestone Tynsong-ia ashi.

Karbi tsür ka rongsetba atema nisung 2 apu

Raha, April 23 (Agencies): Assam kübok Nagaon district nung arishi küm 12 tain tanur tetsür ka asüba atema nisungtem kanga aoksaogo. Tanutsüla ya yashi nikongdang mi agi rongset aser iba dak sendakba nung la aliba ki kibur den jabaso police-i puogo. Yashi iba lendong atalokba sülen social media nung nisungtemi tanutsüla aliba ki kiburtem dak temolung malemba osangtem lemsatapa liasü. Ajisüaka, la aliba ki kiburtemibo la sasa soset ta ashi. Police-i bushisüngdanga aodang tanutsüsa la mezüng tepset aser iba sülen mi agi

arong ta bushiteta liasü. "La aliba kiburi tanutsüla la sasa soset ta ashi. Ajisüaka, onoki bushitepa aodang la ya mezüng tepset aser iba sülen mi agi arong ama temolung melemi bilemer. La tangar kidang kilir inyaksü arishi küm agi ano matong asü. Anungji onoki nisung ana dak tai tonglokja puogo" ta Assam nung Director General of Police, Bhaskarjyoti Mahanta-i ashi. Nagaon police-i social media nung iba ken o ketdangsür tejentemi bushisüngdang südar aser temolung melemi bilemba nisung ana puogo ta osang metetdaksüogo.

Meghalaya nung NLFB tongti tanishir ka apu

Tura, April 23 (Agencies): Bodbarnü Meghalaya police-i Assam nung amenoka aliba National Liberation Front of Bodoland (NLFB) tongti tanishir ka puogo. West Jaintia Hills district nung NLFB telungpurtem senzür ta osang angazükba sülen Meghalaya police Amlarem tesem nung Jotish Daimary (42) apu. Police-i pa ket nungi mobile phone 6, gari ka (AS-01 AE 4845) aser taitüsü aketba kaketterem ngutetogo. Daimary ya taoba mapang National Democratic Front of Bodoland (NDFB) züngsem ka liasü. Ajisüaka, January 2020 nung Centre-i NDFB telok pezü aser All Bodo Students' Union (ABSU) den Bodoland

Territorial Region (BTR) nung sign asüba ajanga NDFB nung züngsem ajak temai adokogo. Daimary-i 2009 nung NDFB nung aden aser Bangladesh nung arms training agia liasü. "Meghalaya nung pai mapa inyakba aser yaritepertem metetsü atema onoki pa dang asüngdangyadar. East, West Jaintia Hills aser Ri-Bhoi district nung nisung apuba, nisung tepsetba aser tanga ken o aika nung pa dak tai tonglokja lir" ta police ketdangsür kati ashi. Külen, Daimary ya Ri-Bhoi police ket nung agütsüogo, ta paisa ashi. NLFB tanishir ya international border leni prangpong-injang alitsü jembiteptsü aodang apu ta police ketdangsürisa metetdaksü.



TIR YIMYIM YIMOBILEM (EDITORIAL)

DIMAPUR KÜPTOKNÜ, RONGCHII (APRIL) 24, 2021

Mopong agi anünger

Tanü putu nungbo alima nung angati angutsü kecha maka, ajak sen agi alitsüba dang, anungji sen maker asoshi alima nung alitsü kanga tasak kümogo. Aji oda, akhidangbo angati ayong tzü teka agi metemteta jema aliba to, tanü asüngbo ayong tzü tajem majung kümogo aser tzübo ajak kongadoker, anungji joko tzü dena alia ajemer. Ajsüaka, taküm alitsü asoshi nüngdak ajak dang tongtibangtiba mopongbo angati angur. Atangji, moponga akhidang amato temerük tajung masü saka tanü tashibo angati angur. Science-i ashiba agi, kodang asenok tango sashitsü atema mopong asükettir, idangji mopongji tepokboki iadoker aser tepokbok nung jagi oxygen ta ajaba mopung tapu ka azüi aoer aser ano azü nung jagi carbondioxide ta ajaba menügdakba mopong tanaben tepokbok jagi meyipa yoker aser tepokbok nung jagi asen teni ajanga sadoka endoker. Iba amaji mopong tapu ana oxygen asüketli aser carbondioxide sadokli ta maneni melentepa tango sashiba ajanga nisung taküm alir. Asenoki aji melamelar amai bilemer, kechiyong mopong agitsü atema kecha balaka belemseta mapa talila ka meinyaker aser senotsü endoka malir, mopong yabo odang parnoksa angati arur. Ajsüaka, tang ama Covid-19 tashidak agi tonger tangoa mesashiteti kodamasü shirangba mapangang, asenok anema alidang oxygen angati talubosa anguba jenjang to angatetter. Aji oda, tang India nung shisabolu tulutibaji Covid tashidak wara aruba agi masü, mozü kidang yipten , mozü aser doctor-tem agi meperiba agia masü saka oxygen agi anünger. Asenok anema alidangbo Tsüngremi asenok nem angati agütsüba oxygen to asensasa agitet saka tangbo asensasa magiteter, anungji nisungi yanglua agütsütsüsa akümer. Aji oda, oxygen yanglua magütsüetba ajanga Maharashtra state nungbo Covid-19 agi shiranger aika süogo. Maharashtra state nung ya Shiv Sena-i anir NCP aser Congress teloki yimsü asür. Iba jagi center nung BJP teloki aniba government-i parnok dangi oxygen aser Covid mozü peria meyoker ta Maharashtra state government nung lenirtemi bilemer. Ibaji shitak asünungbo center government-i pei nübortem anema tsükchir danga tamajungba inyaker asütsü. Iba jagi Maharashtra nung Shiv Sena, NCP aser Congress yarirtem dang masü saka BJP yarirtem dena kasasa lendongi aitsü, kechiyong nübortem ajak asoshi Covid mozü kibo kasasa lir. Ibaji center government-ia angateta alitsü, anungji Maharashtra nung oxygen agi meperi anüngbaji opposition teloki yimsü asüba state asüba agi asaa oxygen meyok masü saka linük nung shitakba oxygen agi meperi aküm asütsü ta bilemer. Atangji, tangbo Covid wara ya ajungbena arur masü saka imlaa alidang arur, anungji India ama, Covid nokdangtsüba mozü yangluteta tangar kintem dangia yokba lima ka nung oxygen agi meperi nisung südaktsüba mapa aser otsüji center government atema tamakok tuluka asütsü. Reprangdangra, center government nung alir yimsüsürtemi anir yimten lenirtemi Covid-19 tashidak wara nokdangtsü asoshi lemtetba sentongtem sülen kenyongi manidaker. Covid wara nungi kümzüksü asoshi tangar anasai maotsü ajungshir saka election atemabo nisung meyerijang metsü semer adenshidaktsür. Ano, tamangba yimsü dak aketba benjong nungbo nisung meyerijang dak tali ayong nung adenshia tzü chigur. Iba amaji kecha hau ta mali ita junga telok telok senden lia jajaba mapang Covid wara mopong tanaben arur. Atangji, tang aruba tashidak wara yaa Covid-bo Covid-19 saka tamasaba dang nungibo tang ya tesashiba ta medical mongintemi ashir. Tamasaba nung tobo tanur aser lanurtem dakbo matong saka tangbo tanur tain ta mali, ajak dak atonger. Iba ama tashidak wara tesashiba akümdang, yimten lenirtemi anir tali kumdangshitsüla aser kechisüdir süaka mozü kidang yipten, mozü aser oxygen-bosa peria angutsüsa, kechi teloki yimsü asür ta masü saka ajak India nung ta asüba tangatetba nung ato kilonser, Narendra Modii anir rongdaknüngdaka inyaksü imlar.

OLEMSABANG

Tanü alima tiaji ya ?

S. Nuken Longkumer, Naga United Dimapur

Laishiba nung khristan anentsü aiben shia lir jembia dokogo? Anungji Tsüngrem o ya ochi lir; otzü ajak rajema angatetsü asoshi Tsüngrem o asen den lir bushiang? Otzü dangi meyipdi!! Alima nung Govt. ka yanglutsü party aika lir, saka iba telok jagi khristan samatsütsü tamakoktsü lir? anungji India lima nunga BJP telok ya tai masü meimchir takümüji tai asütsü!! party ka nungji tanak aser temesüng aika dena lir. Item ajak nungji olulutem jembia oya atatsü? Anungji tanü alima aritepa renloka aor asü nung jembiba ama par telok ajanga inyaker asü masü par mapaji nupuri repranga atar!! Yamaji khristan anemer mali mumgbo otzü ya tiazü akümtsü? Saka shibai Tsüngrem o anemer tia maka?? Tanü alima ajunga nung opposition makai yimsü asüba lima kecha mali yamaji alima ya memelenshitsü saka mapajibo melenshia aotsü, Tsüngremer sendong tesüngmangtsü lir?? tatalokba ajak aseni angur ajurur!! Belemdangang taoba mapang Negro nungertem America lima alar tia nung alidang par tsüraburi Tsüngrem bushi par khuret yutsü!! Parnoki amang aser sarasadem teyimla ajak Tsüngrem den lir ta ayimden!! Tanübo alima ajunga nung nungtugo ken atener, asayar tajung timtiba kümogo? Tsüngremer mangdang kodanga amajok masü, mepishira yimlaseta lira ataloktsütsü! OBAMA President akümdang White House kima ajep ta ashir!! kechiba ajep par tsürabur alar tia belemtet!! Yamaji asen taküm nung mapa ajanga inyaka sayutsüla, tanü party balala longjemer takok angutsü belemer otzü aika jembiteper, saka sendongtem koma aor repranga asen nupurtemji yongyatepa lir?? tanü yimti tulu tila ajak nung car senzütepba agi anü aluba memeteter, yamaji alima to renolka odaki ano oyasa atatsü? Saka iba tensa mapang ka nung asen limabo industry kecha maka, inyaksü mali! mapa aika takar den lir saka chimar nem dang agutsür, kechi otzü jembitsü? Asen jenjang tangar lima nungi bener aruba oset alitsü atatepa lir? tanü party yanglutsü govt. yanglutsü arishiteper ochibo teyimla maka, skak pei ajungdang belema nür lima yanglutsü ariteper masü, joko nür RCC ang sensaker nükshiyima doktsür yanglutsü sendong yur govt. yanglutsü ariteper?? Meimchir aikati nenok ama kümnür!! Saka matonger nenokbo alima yanglusang Tsüngremer sendong nung aten? anungji jung junga amang nung nü yipden shisadangang aser inyakang!! Asen Nagalima nung car lemanj tajung kwika ali iba atemabo khuret maka ama, election mapang indokba nükla yoker?? Tanü tiazü ainkar aika adoka aor asen nupurtem aika agizüka chiogo? Anungji asen lima yamai akümer!! MLA 60 ya tai maka asen nupurtem tai amai repranger joko aji anenadokang asen lima temenungratsü city yanglutsü mangdang ayutsüla! Chuba yimli nung mena alirtemi kanga junga asadanger nenoki nangzükba ama ajak ta masüyonga nupurtem tejangrabaji tasadang ka tashibosa inyakdaktsüra tangar lima nung küm aika arishia yimsü asüba medem, nenok arishia nur govt. yimsü südaktsütsü asen nupurtem tashi lir aser Tsüngremia yaritsü! Alimai nur chuba menden jangratema aser akümketa reprangtsü joko Naga nungertem Negro nung ta alar tia nungi nüchi tia ajurur penlatepba ama asütsü nükla arur koda temenungratsü??

NB: Otsü angateter ajaki mepong den rarar ama tekümdaktsü tulur dang shiang??

Tanü putu den apet kulisüba

~ Mr. Imkümeren (Otongdar)

(Yashi adok nungi...)

* **Ainkar zünket kulisüba:**

Tejen lai mapang nug chuba tashi dang nungi jurila sa ola adoka nübör den jembiba-purji Ainkar tem liasü. Ainkartem mapaji Tsüngrem nungi osang arua nübör timtem, tekangshi aser Tsüngrem taginüba ola agütsüba liasü. Jürgen Moltmann, The Crucified God nung ashir "Meimchir talenba, timtem tia tulu nung alidang saala, chiokbaji ainkar olaji lir." Tanü putu nung iba ola adokba kulisür nungdaker. Lokti, kibong aser tamangba nung teraksa jenti lir. Ochi mashi, teraksa, pei ajung asaba, tamajung ta meshitetba, takar sensaker lemdangba tamangertem, temeimmaliba, nüktpangta azüapongba, Govt. senji angati angu ama amshiba, pei nüji yoka achiba item yagi asen nübör timtemer, yaka tamanger rongnung telemsa. Ainkar ola nungdaker, saka Yisu ama jilu ajizükba agi dang tanü iba ola adoktet. Shibai ainkar ola adoktsü. Arogo, tamanger lokti tanü kolen ali. Yisu-i Luke 4:18 nung ashi pa salatsütsü aru, lapoktsütsü aru, osang tajung sayutsüngitsü aru aser chioktsü aru. Tanü sensaker asoshi ola, tekübok nung alir asoshi ola, libaliro majungba (immoral) asoshi ola, Khrista anemer ola, ochi mashiba anema ola, sübokrem anema ola aser yamaji teraksa tekübok asoshi ola nungdaker. Ainkar ama kulisür tanü putu nung nungdak.

Otem :

Naga nungertem tamanger jenti lir saka tanü taangba kisung nung dang amangba lir saka, Kulisüba kanga anünga lir. Tanü Naga nung asoshi kulisür nungdaker. Tamanger rongnung kulisüba melira tamangba jenjang kangasa tekübok nung lir ta meteti. Yisu-i kuli asütsü asoshi shiogo (Mathi 28:19) saka asenok atateper, shiba atar? Kulisütsü menüadoker, tanü putu nung kuliser nungdaker, na kuliser asü?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Covid anema tenokdangba mapang minorities anema inyak: USCIRF



2019 küm December 5 nü Washington D.C nung USCIRF Commissioner, Johnnie Moore (tiyong)-i Sudan Ato kilonser, Abdalla Hamdok den senden amenba mapang tangokba noksa nung angur. Kasa noksa nung USCIRF Vice Chair Gayle Manchin (ajichi) aser USCIRF director of international law & policy, Elizabeth Cassidy (abelen) nata angur.

April 23, 2021: U.S. Commission on International Religious Freedom (UNCIRF)-i, linük karibo coronavirus anema tenokdangba balala ajanga nütsüing ajema aliba tamangba yimsü amangertem anema inyakogo, mesüra coronavirus tashidak prokshiba atema tai tongloktsüogo, ta metetdaksü.

Bodhbarnü USCIRF-i alima nung religious freedom indang report metetdaksüba den külemi coronavirus wara mapang nung linük balala nung religious freedom anema inyakba osang tejangja metetdakja liasü.

Osangbenertem senden ka nung USCIRF Chair, Gayle Manchin-i, linük aika nung coronavirus proktsü atema tenokdangbatem ajanga meimchir temeden balala anema meinyak, ajisüaka linük karibo wara anema tenokdangbatem amshia minorities anema inyakogo, ta ashi.

"Tia makai iba ya (wara anema tenokdangbatem) ajanga lenmang aisü nung takoksa nguogo. Iba mapang nung minorities anema jenti inyak aser tanga yimsü dang nungibo nütsüing ajema aliba yimsü amangertem anema ozüing tesashiba benoka liasü, ibaji ajanga tebilemtsü adoka liasü," ta laisa metetdaksü.

"Ano linük kar nungbo coronavirus tashidak prokshiba atema tamangba yimsü kar nem tai tonglokja liasü," ta lai ashi.

"Linük karibo coronavirus wara nungi maongka agia minorities nem temerenshi agütsü. Wara anema tenokdangba aika international ozüing nung aliba ama liasü, saka tenokdangba kar ajangabo minorities yirutsüogo mesüra tamangba yimsü temeden alema inyakogo," ta USCIRF report nung shia lir.

Manchin-i, "Tenokdangbatem agiendar, aser iba mapang nung linüktem

nung tamangba yimsü balala amangertem ajak kasa züingshitsüla, aser onoki ibaji mita repranga atatsü," ta ashi.

"Tatishitsü kaji Malaysia linük lir. Iba linük nung Muslim yimsü dak alaka Hindu aser Khristan densema tanga tamangba yimsütem indang tekülem kitem tanaben melapokdaksü. Muslim nunger tekülem kitem tanaben lapokdaksüba mapang nung tanga yimsü tekülem kitembo melapokdaksü liasü," ta report nung shia lir.

Malaysia linük nungsa refugees aser bendanglen nungi arurtembo Muslim nunger tekülem kidangi metudaksü.

Turkey nunga nisung kati, linük nung Khristantemi wara prokdaksü, ta tai tonglokja Armenia nunger Tenla ki ka rongdoktsütsü meranga liasü.

USCIRF-i ashiba agi, Pakistan aser Saudi Arabia nung sorkar ketdangsertemi coronavirus tashidak prokba atema Shia Muslim nunger nem tai tonglokja kiyong kar nungbo tenokdangba sashia benoka liasü.

Pakistan nung coronavirus prokba atema Sunni Muslim nungeri Shia Muslim nunger nem tai tonglokja liasü.

USCIRF-isa ashiba agi, India aser Cambodia na nung Muslim nunger kanga sendoka liasü, kechiyong linük ana nungji coronavirus tashidak mezüing putetertem aika Muslim nunger liasü. India nunga coronavirus tashidakji Muslim nungeri prok, ta tai tonglokja Muslim nunger anema inyakba tatalokba aika liasü.

"Sri Lanka nung ketdangsertemi tamangba yimsü balala nungi coronavirus tashidak agi asürtem tasü mang rongdoktsüla ta tuyua liasü, ajisüaka Muslim aser Khristantem densema yimsü karibo tasü mang rongdoktsüji memelar," ta report nung shia lir.

USCIRF-isa, coronavirus

wara ajangasa nütsüing ajema aliba tamangba yimsü amangertem anema osangtsüsang tai proka liasü, ta metetdaksü.

USCIRF-i U.S. State Department dang countries of particular concern (CPC) nung linük 14 züingoktsü atema benok. Item linük rongnung 10 bo State Department-i CPC ta yaküm züingoka aliba linüktem lir (Burma, China, Eritrea, Iran, Nigeria, North Korea, Pakistan, Saudi Arabia, Tajikistan aser Turkmenistan).

Iba dak alia USCIRF-i linük pezü- India, Russia, Syria aser Vietnam linüktema CPC nung züingoktsü atema U.S. State Department matsüing dang benokogo.

Tamalen India sorkari aser sorkar pusemba teloktemibo USCIRF dang CPC nung India züingoktsü atema lemtetbaji agienang, ta mepishia liasü.

USCIRF vice chair, Tony Perkins-i, taküm report nung tamangba yimsü anema inyakba linük tamajungtiba rongnung China densema lir, ta metetdaksü.

China linüki Xinjiang province nung Uyghur Muslim nunger anema inyaker. Taküm January ita nung US sorkari China nung Uyghur Muslim jenti tepseter aser iba ya meimchir temeden anema inyakba lir, ta sangdonga liasü.

USCIRF Commissioner, Johnnie Moore-i, küm 25 tejakdang USCIRF-i mezüing China nung Uyghur Muslim nunger reshikangshiba osang sangdonga liasü, saka alima linüktemi iba atemaji kecha meinyak, aser China nung Uyghur Muslim nunger tang tamajungba reshikangshir, ta ashi.

Ano meimchir temeden anema kanga mejungi inyakba linüktem rongnung North Korea densema lir; iba linük ya CPC nung züingoka lir, ta USCIRF Commissioner, Frederick Davie-i metetdaksü.

ANO GO ABEN TSÜNGREM DEN

Ajak dang tajungba

"Ajiang, tashi angabaji tetepsetba tenla dang nungi tajungba, aser O angabaji san tepong temo dang nungi tajungba". I.Sam. 15:22b

Kechi mapa südir süaka ajak nung atasaa inyaktsüba kanga tongtipang, kechiyong matatetba ajanga aben takok angutsü melen tesamaba ajurur. Laishiba nung tenla agütsüyim tapu balala indang ashiba angur. (Tarongba tenla, chiyungtsü tenla, yimjung tenla, temeshitetba tenla amala). Aser item tenlatem ajakji putirtemi Amalek amakdang ajak samatsütsü melena san tajungtibatem, nashi teyiraba aser Agag chuba den itemji bener aru. Tanabuba nung Sauli putir Samuel maruba tsüingda makzuka bener aruba san aser nashitemji Gilgal nung tepseta tenla agütsü, item ajakji Kibubai melaba ama mesüi pai Kibuba tsüingdang tesembatsü mapa inyak nung pa chuba menden nungi jentok. Adianutem, aseni khen khenbo Tsüngrem taginüba nung masü, nübür mesüra aseni aginüba tsütsü atsünga inyakdang asen mapaji Tsüngrem tsüingdang tesembatsü akümer; anungji aseni kechi inyakdir, agütsüdir Kibubai mulungba nung tashi angaa asen mapa tajungtiba agi Pa tenüing tulepa sentsüwangshidaktsüdi.

Sarasadem

Oh! Kibuba Ne tsüingdang tashi angaba taküm ka süa litettsü Nai ni moajangma. Amen

Thailand nung Khristantemi Myanmar nungi Karen refugees yarir



March 29, 2021 nü Thailand-Myanmar arrtsülen Salween River ayong anasa Karen nunger Khristan refugee tem noksa nung angur.

April 23, 2021: Thailand sorkari Myanmar nungi refugees agizütsü memelunger ajisüaka Thai province nung Khristantemi Myanmar linük nungi jenshiba Karen refugees meyrjang aika yaria arudar, ta osang ka ajanga metetdaksü.

Myanmar nung Karen nunger nütsüing timbaka Khristantem lir.

Chiang Mai nung Catholic Khristantem aser Khristan lenirtemi Myanmar kübok Kayin state nungi jena aruba Karen refugees aika yaridar. Karen refugee temji tamasabo Thai-Myanmar arrtsülen aliba Thanlyin ayong anasa arem ka nung atsüka liasü.

Tang Myanmar nung mitkartemi yimsütsüba mapang democracy pusemertemi mitartem anema longkak aitba ajanga linük nung tensa kanga mejungi lir.

Tawa osangbener den jembidang Chiang Mai nung tongti putir, Francis Xavier Vira Arprondratana-i, Arogo nungi temi arrtsü anasa Salawin National Park kübok tesem ana nung March ita nungi tenzüka

Myanmar nungi jena aruba Karen refugees nem teyari agüja arudar, ta metetdaksü.

Putirisa Thailand nung Arogotem dang senotsü, tzü, chiyungtsü aser mozü densema nungdak balala agi refugees yaridaksünier, ta ayongzükogo.

Thailand nung Federation of Religious Superiors Tir, Sister Aranya Kitbunchu-i Ching Mai Arogo aser Caritas Thailand den yaritepa refugee tem kümzüka maparen inyakdar.

Sister Aranya-i, "Refugee tem kodamasüba tensa ka nung lir; parnoki chiyungtsü, tzü aser mozü densema teyari balala nungdaker," ta metetdakja liasü.

Khristan timba ser Karen nunger 3,000 dak tema arrtsü adena Thailand-i jena ogo.

Taküm February 1 nü Myanmar nung mitkartemi Aung Sang Suu Kyi-i aniba National League for Democracy (NLD) sorkar atsüingdokba sülen nungi tenzüka Karen nunger telungpurtem aser Myanmar mitkartem tsüingda rara tamajungba kumogo.

Buddhist nütsüing timba aliba Myanmar linük nung Khristan nütsüingbo shilem 6 shi dang lir.

OLONG PAITEP # 5791


	1		2			3		4		5
6								7		
					8		9			
			10							
11										
				12						
13		14		15						16
17							18			

- | | | | |
|------------------------------|-------|------------------------------|-------|
| TIPILEN | | LANGTSÜNGLEN | |
| 1. Inyaker ajangetba | - (3) | 1. Meshidak | - (3) |
| 3. Bangsemo adokdak | - (5) | 2. Tanaben soshir | - (7) |
| 6. Shitak mesüi inyak | - (7) | 3. Iba anogo | - (4) |
| 7. Ya mimong nung angur | - (3) | 4. Meshi | - (3) |
| 9. Reprangzük | - (4) | 5. Yagi mi tsükloker | - (9) |
| 10. Tasola | - (5) | 6. Shi tapu ka | - (9) |
| 11. S _ _ _ _ | - (4) | 8. Yagi ayimer saka ozü masü | - (3) |
| 13. Yagi ajak ashiochtsür | - (3) | 9. Ajokba shiruru ka | - (7) |
| 15. Ki aokba oset | - (7) | 12. Inyaktet | - (4) |
| 17. Ak shi nung inokba tasen | - (5) | 14. _ _ _ hi | - (3) |
| 18. Ishika | - (3) | 16. Akümüli nungi pilar | - (3) |

OLONG PAITEP # 5790 TELANGZÜBA

- | | |
|---------------------------------------|--------------------------------------|
| TIPILEN : | LANGTSÜNGLEN : |
| 1. Telok, 4. Aluru, 6. Ozüng, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. teronem, |
| 14. Ola, 16. Talak, 17. Mazük. | 12. Sempa, 13. Jahaz. |

Noksa nung meputepi aliba 10 bushiang




TANÜBO NAI LANGZÜANG

Q. World Press Freedom Index 2021 nung India koba rank nung lir?
 A. 143 B. 142 C. 141 D. 140
 _____ (Taruba adok nung onoki langzüsü)
YASHIADOK TELANGZÜBA: Noida

AO OSHI ANGAZÜKDAK:
TANÜ ANGAZÜKTSÜBA OJANG

Chanu
 (n) tanur tila (little one)
 * Aortemi tetsür chanu o tebur chanu na tsüngda kecha tebandang mali anepalur.

Chichia
 (adj) ochi, tiyazü masü (truly)
 * Aor Yisu yimsü ya chichia agizüka amang.



Tir Yimym

NAI-A YA METETTER MA?

KANGA KARA AINBA SÜNGDONG KAR:



- | | |
|--------------------------------|----------------------------|
| 1. Thuja Green Giant | 2. Leyland Cypress |
| 3. Autumn Blaze Red Maple Tree | 4. Weeping Willow |
| 5. Black Bamboo | 6. Baby Giant Arborvitae |
| 7. Lombardy Poplar | 8. Rainbow Eucalyptus Tree |
| 9. Tulip Poplar Tree | 10. Cleveland Pear Tree |
| 11. Mexican Fan Palm Tree | 12. Heritage River Birch |
| 13. Quaking Aspen | |

SUDOKU # 5834 TELANGZÜBA # 5833

	5	1	6			7	3	9	2	8	5	6	1	4	7	9	3	
7		8				5		2	1	7	1	3	9	8	5	2	4	6
							4			9	6	4	2	7	3	5	1	8
	9		5							8	4	1	7	2	9	3	6	5
	8				1	2	9			3	5	9	8	4	6	1	7	2
6										6	2	7	3	5	1	9	8	4
			1	4	2		5			1	3	2	4	6	7	8	5	9
		2					1	6	4	5	9	6	1	3	8	4	2	7
4	1	5	3	9					2	4	7	8	5	9	2	6	3	1

OJANG LUTEP # 5377

IPEI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>									
ANDG	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>									
IAHS	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>									
EETTAM	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>							
BIRLO	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>									
NGTAAR	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>								
YAREIT	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>								
EKTSNNGDMAÜÜ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>			
MAA	:	<input type="checkbox"/>	<input type="checkbox"/>	<input type="checkbox"/>										
JÜLEBITMESA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>

OJANG LUTEP TELANGZÜBA # 5376

LOKTI NUNG KÜLEMI MESÜNZÜI PEI MULUNGKA NUNG SENZÜDANG TIMTEM ANGUA

TAN HOPTA ATEMA - KOMA SÜLA ?

Q. Covid-19 wara nokdangtsü atema yaküm 2020 küm ama, ita junga lockdown asünunga koma süla ?

Oxygen agi anungba mapang PM-i CM tem den senden amen



April 23, 2021 nü Ghazabad nung aliba Air Force Station Hindan nungi C-17 aser IL-76 tayimtsü ajanga Panagarh nung oxygen cylinders recharge asütsü atema bener ogo. Tang linük nung aliba hospital balala nung oxygen agi kanga anünger.

New Delhi, April 23 (Agencies): Tang India nung coronavirus tashidak agi shirangertem atema oxygen agi kanga anungba mapang nung Hokolbarnü Ato kilonser, Narendra Modi-i coronavirus agi mejungi kongshiba state 10 nungi chief minister tem den senden ka ayongzüka menogo, ta ketdangertem osang ka ajanga metetdaksü.

Tanü agi anogo ananübuba India nung anogo shia nisung lakh 3 tema dak coronavirus tashidak putetba mapang Ato kilonseri chief minister tem den video conferencing ajanga senden mena Covid tensa repringshi.

Iba senden nungji Maharashtra, Uttar Pradesh, Kerala, Chhattisgarh, Madhya

Pradesh aser Delhi Chief Minister tem aden. Senden nung AAP tongti aser Delhi chief minister, Arvind Kejriwal-i Ato kilonser dang, chief minister ajak dang linük yimtibai aruba oxygen tankers sadem-sadema senzüdaksütsü atema tuyudaksüner, ta mepishia liasü.

Delhi CM Kejriwal-i, "Odisha aser West Bengal nungi tayimtsü ajanga Delhi dangi oxygen supply arutsü mesüra Oxygen express nung bener arutsü. Centre-i achaayanga oxygen ji Army ajanga bener arutsüla aser truck shiaji Army escort gari agi miena arutsüla," ta paisa ashi.

"Oxygen agi anungba agi nüburttem kanga timtemdar. Oxygen agi anungba agi

lendong tulu adoktsü, aser iba atemaji onoki onok sasa tai metoktetsü ta onoki bilemer. Ni nü dang Delhi-i aruba oxygen tankers ajak sadema senzüdaksütsü atema tetuyuba agütsütsü mepishir," ta Kejriwal-isa metetdaksü.

"Iba tensa atema linük jenjang nung asalentong ka nüngdaker. Oxygen plant nungi adokba tanker ajakji Army escort garii mientsüla," ta pai ashi.

Kejriwal-isa, Centre sorkar dang vaccine ayokba ama state sorkartem danga kasa jenjang agi ayoktsüla, ta ashi.

Tang linük nung coronavirus case anogo shia timba akümba mapang nung nung Ato kilonseri iba tensa repringshia senden aika mendar.

India nung ano nisung lakh 3.3 dak Covid putet aser 2,263 asü

New Delhi, April 23 (Agencies): India nung ano nisung 3,32,730 dak coronavirus tashidak putetogo; Brihostibarnüa nisung lakh 3 tema dak coronavirus puteta liasü.

Tang tashi nung India nung coronavirus caseload ajak agi 1,62,63,695 jungogo aser tang teshirangdakpur lakh 24 jungogo, ta Hokolbarnep Union health ministry-i metetdaksü.

Tang linük nung coronavirus agi teshirangdakpur 24,28,616 jungogo aser ibaji coronavirus caseload nungi shilem 14.93 lir.

Tesüiba ghonda 24 nungsa linük nung nisung 2,263 süogo aser iba tashidak agi asür ajak agibo 1,86,920 jungogo, ta Hokolbarnep 8:00 ako nung Health Ministry-i metetdaksü.

Tesüiba anogo 11 tashi anogo shia India nung nisung 1,000 dak tema iba tashidak agi asü aser tesüiba anogo pezü tashi anogo shia nisung 2,000 dak tema iba tashidak agi süogo.

Hokolbarnep 8:00 ako tashi nung nisung 13,54,78,420 nem coronavirus vaccine agütsüogo. Linük nung iba tashidak agi

shiranger ajak agi 1,36, 48,159 anepogo aser shirangertem anepba shilem tajemba küma 83.92 dang kümogo.

Linük nung iba tashidak agi shiranger asüba shilem ano tajemba küma 1.15 dang kümogo, ta Health Ministry-isa metetdaksü.

Hokolbarnep Indian Council of Medical Research (ICMR)-i ashiba agi, April 22 tashi nung samples ajak agi 27,44,45,653 tendangogo aser iba nungji Brihostibarnü samples 17,40,550 tendangba densema lir.

UP densema state 6-i vaccine angati agütsütsü sangdongogo

New Delhi, April 23 (Agencies): Uttar Pradesh aser Assam nati mezüing tain ajak nem coronavirus vaccine angati agütsütsü, ta sangdongba sülen anogo ka lir Kerala aser Chhattisgarh na densema state pezüia vaccine angati agütsütsü, ta sangdongogo.

State nung ajak nem vaccine angati agütsütsü, ta metetdakja Kerala Chief Minister, Pinarayi Vijayan-i, "State nung iba vaccine angati agütsütsü ta ni tamalen nungi jembia aruogo," ta ashi.

Kerala dak alia Bihar, Madhya Pradesh aser Sikkim state temia coronavirus vaccine angati agütsütsü, ta sangdongogo.

Kerala Chief Minister-i, "State tem nem vaccine agütsütsüji Centre khuret lir, ajisüaka state tem dang vaccine ji manufacturers dang nungi alizüktsü atema tuyur. Iba ya ajanga state tem nem senotsü tsütsü khuret agütsütsü," ta ashi.

Bodhbar nikongdang tashi nung Kerala nung vaccine dose ajak agi 62,36,961 agütsüogo aser ibaji state nütsüing shilem 14. 88 nem agütsüba lir.

Bhopal nung Cabinet senden ka amenba sülen Madhya Pradesh Chief Minister, Shivraj Singh Chouhan-i, "May 1 nungi arrshi küm 18 ser tempurtem nem

vaccine agütsütsü ta Ato kilonseri sangdongogo. Centre nungi tetuyuba tejangja atadar, ajisüaka Madhya Pradesh nungbo arrshi küm 18 ser tempurtem nem vaccine angati agütsütsü," ta metetdaksü.

Tang Madhya Pradesh nung coronavirus agi teshirangdakpur 82,268 lir.

Chhattisgarh Chief Minister, Bhupesh Baghel aser Bihar Chief Minister Nitish Kumar natia pepei state nung vaccine angati agütsütsü, ta sangdongogo.

Sikkim Chief Minister, Prem Singh Tamang-i, state nung arrshi küm 18-45 tempurtem vaccine agiba atema Centre sorkari sen magütsüra state sorkari iba senji agütsütsü, ta metetdaksü.

Ano külen Rajasthan Chief Minister, Ashok Gehlot-ibo twitter ajanga, "Centre sorkari arrshi küm 18 ser tempur ajak nem vaccine angati agütsütsü ta sangdongtsüla, kechiyong vaccine angati magütsüra lanurtemi Centre dang ano taliba jashitsü," ta ashi.

Maharashtra Health Minister, Rajesh Tope-i, arrshi küm 18-45 tsüingdapurtemi state nung aliba sorkar hospital nung Covishield dose shia sen 400-i angutsü aser nija hospitals nung dose shia sen 600 agi angutsü, ta metetdaksü.



April 23, 2021 nü Beawar nung nisungtem market telungi maitdaksütsü atema tenokdangba yua aliba noksa nung angur. Coronavirus tashidak kanga prokba nokdangtsü atema Rajasthan sorkari tenokdangba balala benoka lir.

Covishield jenjang kasa dang asütsüla: Mamata Banerjee

Asansol/South Dinajpur, April 23 (Agencies): West Bengal Chief Minister, Mamata Banerjee-i shidi ka ajanga Ato kilonser dang Covishield vaccine jenjang balala agi ayokba ya nüburttem anemba inyakyim ka lir, ta metetdaksü.

Laisa, kechiba state temibo kasa vaccine atema sen shilem 167 dak tema agütsütsüsa akümer?, iba ya ajanga market nung ochimashi inyaksü atema ajungshitsü, ta ashi.

India nunger puti otsü nung kasa vaccine atema jenjang

balala meshiba ya ni kodanga mangashidang, ta lai ashi.

Mamata-i twitter ajanga, "BJP-i mapang shia linük ka, party ka, lenir ka ta ayimdenner, ajisüaka takümtem kümzüktsü asoshibo parnoki vaccine ka atema jenjang ka (kasa) magütsür," ta ashi.

Chief Minister Mamata-i Ato kilonser Modi dangi züluba shidi nungsa, "Linük nung tang ama tensa tamajung ajuruba mapang ka nung vaccine yanglurtemi tajangzük angutsü atema meinyaksüla," ta shia lir.



April 23, 2021 nü Indirapuram, Ghaziabad nung gari lenmang nung coronavirus agi shiranger kati oxygen agiba noksa nung angur. Oxygen ji Sikh nunger telok kati agütsüba liasü.

Indonesia indang submarine bushiba nung US adener Libya anasa rong mükepok; migrant 100 dak tema samar bushir



Banyuwangi, East Java, Indonesia anasa Bodhbarnü training agiba mapang samaba submarine KRI Nanggala bushitsü atema National Search and Rescue Agency indang rong ka aoba noksa nung angur. Anogo ana tejakdanga samaba submarine nung alirtem asoshi iba submarine nung oxygen anogo ka peri dang lir aser Hokulbarnüa iba submarine aliba tsüngsü monguteti lir.

Jakarta, Rongchii/April 23 (Agencies): Nisung 53 mener samaba Indonesia indang submarine bushiba nung US mitkari tayimtsü nungi teyari agütsür.

Iba navy submarine nung oxygen agimatsü ghonda ishika dang lir aser aji masüdüng iba tzüyim telung nung amshiba rong ya ngutettsüla, ta Indonesia ketdangsurtem ashir.

KRI Nanggala 402 submarine ya Bali tzükumlen Bodhbarnü sama aser ketdangsurtem taoksanung iba submarine ya bushi tenzük.

Iba submarine tzü telungi aiba anasa totzü yimshia aliba ajanga submarine nung totzü pong raksa südi, ta amanger.

Iba timtem asoshi US kanga jashir, ta Pentagon odongtar

John Kirby-i ashi. "Indonesia rong anir aser parnok kinungertem asoshi onoki sarasademtsür. Indonesia sorkari jaokba ama asenoki samar aliba submarine bushitsü atema tayimtsü teyari agütsür," ta Kirby-i sangdong ka nung ashi.

Tzüyim telung nung feet 165 nungi 330 tsüngta oset ka aliba puzük aser ibai KRI Nanggala 402 ya alitsü südi ta teimla nung sonar-tracking equipment aliba rong tem yokogo, ta Indonesia mitkartemi Brehostibar aonung ashi.

"Asüngnep (Honibar) 3:00 ako tashi nung iba submarine ya mongutetra, oxygen ajunga atemtsü aser yangji alir ajak asütsü," ta Indonesia mitkar indang odongtar Achmad Riadi ashi.

Raradang amshiba rong trok, helicopter ka aser nisung 400 shi iba submarine bushiba nung shilem agir. Singapore aser Malaysia linüktemi iba tesemi rong yokogo, aser ano Australia, France aser Germany linüktemia yaritsü molunga lir ta shiogo.

Bodhbarnep 'live torpedo exercises' agiba mapang tzüyim telungi aitsü temelaba meshiba sülen mapang tatsüka lir KRI Nanggala 402 den osang magitepteti akum. Indonesia nung submarine pongu lir, aser item rongnung Germany-i yangluba iba submarine ya dena lir. Iba submarine ya 1970s tatemlen yanglu aser ano South Korea nunga küm ana tashi yanglushiba 2012 küm renema liasü.

Tripoli, Rongchii/April 23 (Agencies): Libya anasa tzüyim nung rubber agi yangluba rong ka mükepokba sülen migrant aser refugee 100 dak tema süogo, ta shisabulur, aser iba lendong nung takum ngutettsü teimla mali, ta teyari agütsüba telok kati ashi.

Europe nungi meimchir nem teyari agütsüba telok, SOS Mediterranee ajanga Brehostibarnü ashiba agi, Libya anasa nisung 130 mener aliba rong ka nung timtem ajuruba osang liasü, aser iba den ano danga rong ana liasü.

Iba osang angazükba sülen NGO's Ocean Viking den danga rong tulu asem dener timtem nung alirtem bushia kumzüksü maparen tenzük.

"Lendong atalokba tesem tanü tonga aru aser nisung takum kata mangu aser rong teraksa anasa nisung tasümgang ter shi angu. Onok temolung raksar lir," ta Ocean Viking nung ketdangsur Luisa Albera-i ashi.

International Organization for Migration (IOM) nung chief of staff, Eugenio Ambrosi-i ashiba agi, Central Mediterranean nung atalokba lendong nung nisung tajemba agi 100 takum sama.

Central Mediterranean migration route nung iba lendong ya tang tasenba lir, aser tesem balala nung mapa bushia senzür (migrant)

nisung 350 shi takum yangji süogo.

2014 küm nungi tenzüka migrant aser refugee tem Africa nungi Europe bushia aotsü merangba mapang parnok 20,000 dak tema tzüyim nung süogo.

Item rongnung nisung 17,000 dak tema Central Mediterranean nung asü, koba alima nung migration route tamajungtiba, ta UN ajanga ashir.

2011 küm Muammar Gaddafi tepsetba sülen Libya nung rongrong adoka arur.

Yimsüsür anema nüburtemi nokdakba sülen Libya ya migrant tem ayamesoba tesem tongtipang ka akum. Libya nung amenoka aliba nisung shibelener temi rong tila aser ango apuba rong teraksa nung Europe atongtsü teimla nung migrant tem mendaktsür animesor.

Nisung meyirijang aika lenmang nung arakseta asü aser aika lenmang tum nung apur.

Libya tzükum anüker nem par linük alema aoba nokdangtsü asoshi training agütsüba aser senotsü teyari agütsüba nung European Union-i sen million \$109 dak tema indokogo, ta ashir.

UN agencies ajanga European Union-i Libya dangi sen million \$397.9 dak tema yokogo, ta Associated Press ajanga bushisüngdanga nung ngutet.

Chad Tir Idriss Deby den asüpila sentong agiogo

Ndjamena, Rongchii/April 23 (Agencies): Sorkar anemba telungpur telok den sepaitem anir Hombarnü raradang tepsetsang Chad Tir Idriss Deby den asüpila sentong ka linük yimtiba, Ndjamena nung Hokulbarnü agiogo, kong nisung meyirijang aikati par lenir tem akum agüja liasü.

Hokulbarnü iba asüpila sentong nung France Tir Emmanuel Macron, Guinea Tir Alpha Conde aser danga Africa lenirtem kar arua adentsü teimla lir, saka sorkar anema nokdakertemi parnok dang iba sentong nung madentsü ashi.

Hokulbarnü Macron-i linük nung telungjem aser tesunep asoshi yaritsü nangzük saka mitkar lenir dang timi civilian nem yimsü südaktsütsü ajungshia liasü.

Linük north tsütsü arrtsülen nung Ndjamena leni aruba telungpur telok den sepaitem anir raradang Deby asü ta Chad indang mitkartemi Mongulbarnü sangdonga linük aoksadaktsü. Pa ya arishi küm 68 liasü.

Deby-i Chad nung küm 30 dak tema yimsü asü aser pa anemertem par ki kima tashi aruaka pai tir menden metoktsü. Zaghawa ethnic telok nungi

Deby ya Ennedi indang northeastern region nung inet. Chad nung civil war tenzükler mapang talangka aruba mapang pa ya 1970s tetenzüklen army nung aden aser France nung military training agia liasü.

Deby ya mitkar indang commander-in-chief jenjang tashi atu aser 1990 küm kisüngi yimsü asüsang Hissene Habre atsüngdoka nüburtem anir nokdakba sülen tir akum.

Pai 1991 küm February ita tir office agizük, 1996 aser 2001 election tem nunga takok ngua ano 2018 küm constitution nung temelenshiba ka lidaktsü, koba ajanga pa 2033 küm tashi yimsü asütsü mela liasü.

Pai tashiyim amshia yimsü asüba asoshi human rights telok temi aijaka alimai telungpur anema raraba nung pa ya astüolen linüktem den mitkar tsütsü tembar tongtipang ka liasü.

Pai tir election nung takok nguogo ta election ketdangsurtemi sangdonger anogo ka lir asü. Opposition telok timbai iba election nung shilem magi. Tang par jabaso arishi küm 37 tain General Mahamat Idriss Deby-i ita 18 tashi transitional military council anir alitsü.

French envoy meindoktsü atema Pakistan parliament nung maneni jembitsü

Islamabad, Rongchii/April 23 (Agencies): Hopta ka shi France anema azüdokshia longkak aitba Pakistan sorkari tang atema anendaktsüba sülen France ambassador tia atema parliament nung maneni Hokulbarnüa jembitsü. French envoy meindoktsü asü masü, anüolen linüktemi tamangba yimsü mezüngmeshiba national assembly ajanga aitsütsü, iba ken o nung Muslim linüktem lungjemtsü aser tarutsü nung longkak aittsü asoshi ketdangsurtemi tesem agütsütsü atema pangzüng ka yanglutsü

asoshi o inceptsü.

Tang sorkar kumteta aliba party nungi züngsem kati pa juri ama benokba pangzüng ya opposition ajanga o tesashi aliba ka agi melentsütsü amai lir, saka aji tatembang masütsü.

Prophet Mohammed mesüka yangluba cartoon tem magazine ka nung tanaben adoktsü asoshi France Tir Emmanuel Macron-i bukuma jembiba sülen Tehreek-i-Labbaik Pakistan (TLP) ajanga ita aika France anema longkak aita arur, kechiaser Muslime nunger aikati iba ya tamangba

yimsü mezüngmeshiba ka amai züngshir.

French envoy meindoktsü asoshi takhangba agüja linük yimtiba nung longkak aittsü ayongzükba ajanga TLP lenir apuba sülen taoba hopta nungi linük tesem ajungalen iba telok busemertemi tashiyim amshia longkak aita arur.

Longkak aitba tesashiba akumba mapang French embassy ajanga par senso ajunga dang Pakistan yutsür aotsü ajungshia liasü, saka par nüburtemi züngzünga magizük.

(Maneni tapak 9 nung...)



Lima, Peru nung COVID-19 tashidak wara prokshiba ajemdaktsütsü mechi rongsenketsüng inyaksangshi nung tenokdangba agütsüba ajanga ki para memonokteter tem Villa El Salvador tesem nung adenshia süki yanglur sorochiokba noksa ka yangi angur.

Tanü 'Mega Model Hunt' grand finale agitsü

Dimapur, Rongchii/April 23, 2021 (TYO): Nagaland Mega Entertainment-i Honibarnü (24.04.2021) RCEMPA, Jotsoma nung Mr & Miss Nagaland Mega Model Hunt season 1 indang grand finale sentong ayongzüksü terenemba lir.

Iba grand finale sentong nung host ji Ruofuozhano Whizo aser Jury züngsem nung Fashion designer, Theja Sekhose, taoba mapang Miss Northeast & Miss Mokochung, Tiarenla aser Art & Drama Educator,

Cynthia Kolakhe nung alitsü. Iba sentong nung alakteta tejaoker ama Dr Kekhriehazo solo, Nise Meruno aser tanga tongtibang nübutem aruagi adentsü.

Mr & Miss Nagaland Mega Model Hunt season 1 - grand finale show ya taoba mapang Mr. International India, Opang Jamir-i 'choreograph' aser direct' asütsü. Kasa mapang, Special Artist ji Apple Music Award angusang Imcha Imchen alitsü. Imcha ya Mumbai nung

alir aser pa ya ken zülur aser ken mejemer ka lir.

Delhi nung Covid-19 tensa mejungi akümba ajanga grand finale sentong nung Mr aser Miss India Globe Director aruagi madentsü, ta sentong ayongertemi metetdakja liasü.

Iba sentong nung aruagi adener ajaki tejak nembangba mask inoktsü aser Sorkari teyuba SOPs ajak nung anidaktsüla. Iba den külemi sentong metenzükdang entry point nung sanitization maparen achaayangtsü, ta NME-i metetdaksü.

Capital College nung Literary Day mungogo

Kohima, Rongchii/April 23, 2021 (TYO): Hokolbarnü (23.04.2021) Capital College of Higher Education Kohima nung Literary Day sentong ayonga agiogo. "Unmasking the Mask" omen nung ajemdaker Department of English aser Literary Cell longjemer iba sentong ayongzükä liasü, ta sangdong ka ajanga metetdaksü.

Covid-19 tensa tamajungba küma aoba ajanga iba sentong ya yimya balaka nung agia liasü. Iba sentong nung shilem agitsüpur tem tsüngdong aruagi aden aser tanüngba kaketshirtem 'Zoom' ajanga pei pei talidak nungi shilem agiogo.

Küm nung khen ayonga agiba literary event 2021 ya March 23, 2021 nü nungi

tenzükä anogo balala nung tetoktepba tem agia aruogo. Competition talisa otsünu, sangro, otsü aser painting tem anogo balala lemsar agia liasü. Kasa mapang virtual ajanga 'role play' aser 'short film' toktepba agiogo.

Iba sentong nung tongti o jembir Dr. Adenuo Shirat Luikham, Asst. Professor, Don Bosco College liasü. Principal, Dr. Zokho Venuh-i telok pela agizük aser Head, Department of English, Mrs. Tatongkala Lemtur-i iba sentong indang telok dang metetpeladaksü. Rhovelu Soho aser Leiyng Konyak nati iba sentong ketdangsüa liasü.

Telemsa balala atema award angurtem yamai alitsü:-

1. Poetry Winner - Bentakum

C.Chang
Runner up - Rhovelu Soho Hauli Konyak
2. Essay Winner - Roupfuzhano Whiso
Runner up - Nimrei
3. Short Story Winner - Sapna Dorgi
Runner up - Shochimla
4. Painting Winner - Bendangienba
Runner up - Mantam Konyak
5. Role Play Winner - Rhovelu Soho
Runner up - Senulu Tetseo
6. Short Film Winner - 6th Semester
Movie Title - Made in Pandemic
Best Actress - Senulu Tetseo
Best Actor - P. Honka Konyak
Best Supporting Actor - Thujopalu Venuh

India nung Xiaomi Mi series sayaogo

New Delhi, Rongchii/April 23, 2021 (Agencies): India nung phone janrar temi yonya ataba Xiaomi Mi 11 series sayaogo. Iba series nung Mi 11 X, Mi 11X Pro aser ultra-premium Mi 11 Ultra dena lir.

Pro aser Ultra model nung Qualcomm Snapdragon 888 aser Mi 11X nung Snapdragon 870 SoC inoka yanglutsüogo. Iba series ajunga nung triple rear camera setup den single selfie shooter dena lir. Mi 11 Ultra tesülen secondary display ka angutsü.

Xiaomi-i ashiba agi, Ultra model nung DSLR ama camera angutsü. Ano külen, Mi 11X aser Mi 11X Pro ya Redmi K40 aser Redmi K40 Pro indang rebranded version ka ama lir. Phone asempronlga China nung yokdaki.

*Mi 11 Ultra

Mi 11 Ultra tasazük 6.81-inch alitsü, kong AMOLED WQHD+ (3200 x 1440 pixels) display den 120Hz refresh rate aser 480Hz touch sampling rate inokja lir. Iba display panel yagi 1,700 nits - peak brightness aser HDR10+ den Dolby Vision support asür. Battery tashi tajemba agidaksütsü atema phone nung AdaptiveSync technology

inoktsüogo. Qualcomm Snapdragon 888 processor paired den 12GB LPDDR5 RAM aser 512GB UFS 3.1 storage ajanga phone maparen achaayangtsür aser phone nung IP68 dena lir.

Mi 11 Ultra tesülen triple rear camera system nung 50-megapixel primary sensor, 48-megapixel periscope telephoto sensor aser 48-megapixel ultra-wide-angle shooter inoktsüogo. Camera nung Samsung indang ISOCELL GN2 sensor angutsü, koba Xiaomi nung mezüng feature tasen ka alitsü. Iba den külemi, tesülen camera yagi 5x optical zoom, 10x hybrid zoom aser 120x digital zoom support asür.

Ultra model nungsa secondary 1.1-inch AMOLED touch display angutsü. Iba phone tejaklen 20-megapixel selfie shooter den f/2.3 aperture dena lir. Battery tasazük 5,000mAh alitsü aser 67W fast wireless aser wired charging nungittsü..

India nung Xiaomi Mi 11 Ultra ya 12GB + 256GB variant ka nung dang angutsü aser iba phone jenjang sen 69,990 alitsü.

Maneni, Xiaomi Mi 11X aser Mi 11X Pro anaprongla tereprangtsü kasa alitsü.

Ajisüaka, processor aser camera balala angutsü. Phone anaprongla nung 6.67-inch Full-HD+ E4 AMOLED display den 120Hz refresh rate, 360Hz touch sampling rate aser 1,300 nits peak brightness inoktsüogo.

Iba display panel nung 92.61 percent screen-to-body ratio keta lir. Vanilla Xiaomi Mi 11X nung Qualcomm Snapdragon 870 processor den Adreno 650 GPU, 8GB LPDDR5 RAM aser 128GB UFS 3.1 storage angutsü. Ano külen, Pro model nung flagship Snapdragon 888 SoC den Adreno 660 GPU, 8GB RAM aser 256GB storage dena lir.

French envoy meindoktsü atema Pakistan...

(Tapak 8 nungi...)

Longkak aitba anentsü asoshi TLP lenirtem den jembisang, Interior Minister Sheikh Rashid Ahmed-i ashiba agi, police pongu aser longkak aiter ti takum samaogo.

Longkak aitertemi police tanishir 11 aser special ranger ana ghonda ishika pua ayu aser temang nung zübu ketja azü agi yimbanger chiok.

Anti-terror laws kübok TLP ya taoba hopta

Mulungnen O

Aso:
24.12.1936

Asü:
12.04.2021



Onoki teti meima aliba asür **NOKMAJENLA IMSONG (Akhoya)**, la mapang tatsüka shiranga alidang aser anojungi April 12, 2021 la iba akümlü nungi pila orr onok mangyim jashi nung aliba mapang kija, arogo balala, telok tentetem, medemertem, kiyongertem, kinungertem aser temulunger kwinakati nübu, tanela, rongsen aser sarasadem ajanga onok nungita yariogo, nenok ajak dang kinungertemi pelaba metetdaksür.

Nenok kija shia tenüng teta onoki pelar ta meshitetba atema sasa bilemer, ajisüaka Tulusang Tsüngremi nenok mapa tajung asoshi molamushia maojangma ta onoki sarasademtsür.

Temeim, chirnurtem, semchirtem, anük-apangtem aser kinungertem.

MULUNGNEN O

Asoba:
14/05/1956

Asüba:
18/04/2021



Onoki teti meima aliba ojala asür **Mangyanglepla Longkumtsür** (Merangkong), shirangba mapang nungi asüba anogo tashi ozü shisabulu aser mangyim jashi nung alidang, kija, kibong, adianu, kiyonger, arogo, yimten aser lokti kwikati nübu, rongsen aser tamang sarasadem agi yariogo, nenok ajak dang pelaba lemsateper.

Nenok ajak dangi tsüngdong arua pelaba meshitetakasa asen teyanglur Tsüngremi nenok mapa tajung asoshi talubosa moajang ta onok sarasadem.

Temeim Kinungbu, Chirnur, Kinunger aser Anukapang.

ALIAYOKER Old Showuba area near Four Lane
1. Per Sq.ft. Rs. 90/- 2. Per Sq.ft. Rs.150/-
9856603713 / 9362576107

NSS Pfutsero College nung cleanliness drive ayongzük

Kohima, Rongchii/April 23, 2021 (TYO): Brehostibarnü, Pfutsero Government College indang National Service Scheme (NSS) unit-i cleanliness drive ayongzük. Iba sentong ya ADC, Pfutsero aser college tekolakpur teyari agia ayongzük.

Iba cleanliness drive sentong nung kaketshir 100 dak temai shilem agigo. Kasa nübudok mapa nung College staff temi teyari agütsü aser parnoki College telungtet merükba den jila tesem, Zhipa, Menyitsuda, Reku, PWD, Tese aser Seed Farm Colony tem ayimjema merüka liasü.

Lokti ajungtsü asoshi bendanga agüja inyakba ajiteta, NSS programme officer Nuveta Khusoh-i Unit, Administration aser shilem agir ajak dang pelaba metetdaksü.

Iba ama merükmejuba maparen ya mapang shia inyaktsüla, ajiasünungang lokti nung anema aliba den kati ka tsüngda merük mejua aliba tsütsü ajungshiteptsü, ta Nuveta-i bilemba ka telok den lemsateper.

Iba cleanliness drive sentong ya Swachh Bharat Mission ajanga teyari agüja achaayanga agiogo, ta sangdong ajanga metetdaksü.

nokdangaka aser iba telok lenirtem maneni puaka parnt nung tanishirtemi maneni mera agitsü atema Monulbarnü ayongzükä liasü. "Onoki parnok nem kecha magütsü," ta Information Minister Fawad Chaudhry-i Bodhbarnü osangbener senden ka nung ashi.

Pakistan nung tamangba yimsü ahang-akhanga amshirtem den mepetmesü adoktsü tetsüpu agi Ato

Kilonser Imran Khan-i TLP mesüzük, ta aija arur.

France ambassador aridoktsü mechi azüdokshia longkak aitba ajanga linük dang akoksar ashi France makoksar, ta pai Hombarnü TLP dang mepishia liasü.

Pakistan nung Islam yimsü tera dang mezüngmeshiba mechi kanga sashia longkak aiter, nisungtem zükseter aser political party balala lungjemer nokdaker.

Tokyo Olympics nung Neymar asayadaksüner: Andre



Sao Paulo, Rongchii/April 23, 2021 (Agencies): Taküm Tokyo Olympics atema, forward asayar Neymar anioka shilem agidaksüner, saka iba ya tasak asütsü, ta Brazil indang Olympic football coach, Andre Jardine-i ashi.

2016 küm Rio Olympics nung, Neymar teyari ajanga Brazil team-i football asaya nung mezüing Olympic gold medal angu. Küm 60 tashi iba jenjang metongteti arur sülen, Rio Olympics nung Brazil football team-i iba jenjang ajangzükttet.

"Iba Games nung adentsü maongka angur asünung, onoki football squad tajung ka shimteter asayadaksüner; aser team nung asayar tongtibang rongnung Neymar asütsü," ta interview ka nung Jardine-i ashi.

Neymar-i Tokyo Olympics nung shilem agitsü lenmang kar danga adok yongjia, pa adenba French club Paris Saint Germain indang tenangzüktep dak sendakba nung tetsükdaksü adoker, kechiyong football indang tongtibang tentetem talisa FIFA amala kati

ayongba tetoktepba asayamung ka mesüra, asayatem chioxtsü özüing nung mali.

Ano külen, June 13 nungi July 11, 2021 tashi Argentina aser Colombia nung Copa America asayamung ayonga asayatsü renema lir asünung, arishi küm 29 tain Neymar-i Olympics nung shilem agitsü asoshi lenmang kangarabo madoker.

Tokyo Olympics tenzükter sülen anogo 10 lir Olympic football asayamung tenzüktsü aser French Ligue 1 season tenzükter sülen anogo ana lir Olympic football asayamung ya August 08, 2021 nü atemtsü.

Olympic atema football telemsa repringdangra, Brazil ya Group D nung Germany, Ivory Coast ser Saudi Arabia den alitsü. 2016 küm Olympics football final nung Brazil-i Germany tsükdaksü.

Olympic football team shia nung asayar 18 dang melar aser parnok rongnung arishi küm 23 tema asayar asem dang adentsüla.

Virat-i alizüing tasen ka tongtet

Mumbai, Rongchii/April 23, 2021 (Agencies):

Brehostibarnü, Royal Challengers Bangalore (RCB) captain Virat Kohli-i Indian Premier League (IPL) nung run 6,000 yanglutetta iba alizüing tongteter rongnung pa mezüing kümogo.

Wankhede Stadium nung Kholi-i pa indang IPL match 196buba asayaba mapang iba alizüing tongtet. Brehostibarnü

Royal Challengers Bangalore aser Rajasthan Royals na tsüingda asaya liasü aser over 13buba nung Kohli-i iba alizüing tongtet. Kohli (72*) aser opener Devdutt Padikkal (101*), shibai century yanglu,

tena teyari ajanga RCB-i wicket 10 agi RR akok.

Tang, Indian Premier League (IPL) sabang nung run timtiba yanglua alir asayar rongnung Kohli (6021) mezüing alitsü. Iba sülen, Suresh Raina (5,448), Shikhar Dhawan (5,428) David Warner (5,384) aser Rohit Sharma (5,368) nunger lir.

Iba asaya metenzükdang, Kohli-i alizüing tasen tongtetsü atema run 51 nüngdaka liasü. Team pur takok angutsüsa asayaba den külemi pai run 51 yanglutetdang, IPL nung run timtiba yanglur batsman rongnung pa mezüing aküm.

Natarajan temekok surgery agitsü



Chennai, Rongchii/April 23, 2021 (Agencies):

Sunrisers Hyderabad nungi fast bowler T Natarajan temekok yiruba ajanga tang tasayadak aliba Indian Premier League nungi pa tukadokogo.

Natarajan temekok nung timtem aliba ajanga surgery agitsüsa akümer.

Tan IPL 2021 season nung, Sunrisers Hyderabad atema asaya pezü nungi arishi küm 30 tain Natarajan-i asaya ana nung shilem agiogo. IPL metenzükdang, taküm küm tetenzüklen Australia Tour mapang Natarajan temekok yirua liasü.

"IPL tanüingba asaya nung shilem magitetsüsa akümba ajanga jashir. Taoba season nung junga asayaa aser India team tenüing nungi asaya aru asünung, tan season nunga junga asayatsü imlaa liasü. Ajisüaka, tia makai temekok surgery agitsü aliba ajanga iba season tanüingba asayatem nung shilem magiteter," ta yorker ball aoner takotet Natarajan-i lemsatet.

Ajisüaka, Natarajan-i pa temekok surgery agitsü asoshi anogo tejangja ka memettdaksü.

"Ni kecha agia külem team pur meyaritetsü. Tan season Sunrisers puri asaya ajak

kokyonga aotsü imlaa atar," ta pai shisem.

Australia Tour mapang, Natarajan kanga anibebeba ajanga pa temekok yirua liasü aser iba timtem nungi taneptsü junga menguteti arur Indian Premier League nung pai asayaogo.

"Natarajan temekok yirur aliba nungi ano junga taneptsü menguteti liasü," ta BCCI otongdar kati metettdaksü.

Iba den külemi Natarajan mapang kopika anepalua anisüngzüksü dak sendakba nung BCCI-i osang tejangja ka magütsü.

"Rehabilitation atema pa NCA (National Cricket Academy) nung munga liasü, saka England den asayatsü atema pa renema aliba osang agütsü yongjia, asayatsü atema pa temekok yirur aliba junga taneptsü mengui liasü. Rehab nunga mapang agia anepalu mesüi dang asaya nung shilem agi asünung, mapang agi pa timtem anepalua aser anisüngzüka amungtsü akok," ta kasa sangdong nung shia lir.

Taoba IPL asaya nung Natarajan-i yorker junga aonba ajanga bowler rongnung pa nüngtugu asayar ka aküm aser Australia tour nunga India atema pai format asempronlga nung takok ngua shilem agiogo.

Archery World Cup: Atanu o Deepika na semi final-i iogo

Guatemala City, Rongchii/April 23, 2021 (Agencies): Archery World Cup asayamung nung, India indang temaba archer Atanu Das aser Deepika Kumari nati pei pei tata asaya nung takok ngua recurve - semi final tongtetogo.

Iba World Cup Stage 1 nung India team-i maneni shilem tajung agidar.

Taoba küm Das aser Deepika na kibong aküm aser tenati küm ana sülen iba World Cup asayamung nung shilem agir alitsü. India-i medal pungo angutsü atema Brehostibar aonung recurve temeyoktep asaya nunga tena külemi shilem agia Bronze playoff tonga liasü.

Sports Complex Los Arcos nung asayaba mapang Deepika, shiba no. 3 seed ama qualify süa liasü, lai Germany tsür Michelle Kroppen tsükdaksü.

Taoba mapang world no. 1 Deepika-i point 29, 30 aser 30 angu. Deepika-i mapang magi iba asaya ayong ayonga koktet.

"Temulung nung tejembiba balala aru aser item ajaki azioka süngjemshir nendak nendaka aser asaya nung rangloker

asayatsü lemtet. Ni tajungba asayatetsü ta kü mulungi aru. Mezüing match bilemba ama masayatet aser junga masaya ama bilemer," ta Deepika-i ashi.

"Tang tashi arendaka bilem yongjia, temulung nung anisüngzüik ka lir. Mapang talang ka lir iba ama asayamung nung takok ngua toktepba atema pelar. Iba asayamung nung shilem agitsü asoshi künapronglai küm ka ser tesadangka ataogo aser tanü bilemba atalokogo," ta lai shisem.

Gold medal angutsü atema, Deobarnü, world no. 9 Deepika-i Mexico tsür Alejandra Valencia den semi final asayatsü.

Olympics atema qualify ser alila Deepika-i World Cup anaben tashi koka lir. 2012 küm Antalya, Turkey aser 2018 küm Salt Lake City, USA nung lai World Cup asayamung kokogo. Iba dak alia World Cup Finals nung lai asemben tashi shilem agiogo.

Round tanabuba nung Deepika-i 6-0 agi America tsür Kelsey Lard tsükdaksü aser shootoff' nung laisa London Olympics silver medal angula

Mexico tsür Aida Roman madak 6-5 (10-9) agi takok angu.

Kasa asayamung tebur 'recurve' tetoktepba nung, Das-i Candia nunger Eric Peters madak 6-4 agi kokogo. 2016 küm Antalya nung pai jenjang pezübuba tongtet.

Gold medal round tongtetsü atema, Deobarnü Das-i Alvarado den semi final asayatsü terenemba lir.

Das, shibai ranking round nung tanabuba jenjang anguba sülen round of 32 indang indanga atongtsü atema qualify asü, pai külem team pur Pravin Jadhav makokdang, 6-4 agi El Salvador nunger Oscar Ticas tsükdaksü.

"International tetoktepba asayamung tenzükshitsü atema ajaki yongya ataba mapang ka nung, iba World Cup nung shilem agitsü maongka ngua pelar. Yongya ataba ama iba asayamung tenzükttetogo aser takok ngua asaya odar," ta Das-i ashi.

Temeyoktep tarep nung seed tanabuba aser apuani Das aser Deepika nati Spain nunger temeyoktep tarep koka semifinal tongtet.

Deobarnü Bronze playoff nung, tenati America nunger top seed - Brady Ellison aser Casey Kaufhold den tokteptsü.

Kasa recurve' kija asaya quarter final nung, külem India tsür Ankita Bhakat tsükogogo. Seed tanabuba Ankita-i 2-6 agi Alejandra makok.

India tetsür aser tebur team anaprongla quarterfinal tongtetba sülen, medal angutsü asoshi teimla lir.

2019 küm July ita Berlin kübok Stage 4 nung asayaba sülen, iba World Cup nung India team-i mezüing shilem agir alitsü.



Kielce, Rongchii/April 23, 2021: Hokolbarnü, Youth Boxing World Championship - tebur 56kg category' tetoktepba final nung India nunger boxer Sachin-i gold medal angu. Tesüiba anogo ka tejakdang kasa asayamung nung külem India tsür boxer tenet agi pei tata telemsa asaya koker sülen, Sachin-i India atema gold medal 8buba bendenloktsür alitsü. Tebur 56kg category' final asaya nung Sachin-i 4-1 agi Kazakhstan nunger Yerbolat Sabyr tsükdaksü.

BILEMDANGANG

"Shisa akaribo lipoklisang meteta akümüli wadang jajar."